

A R R E S T

DE LA COVR

DES MONNOYES.

Portant iteratiues défenses d'appor-
ter ou enuoyer, exposer ny rece-
voir aucuns faux douzains, vul-
gairement appelez douzains de
la Rochelle, de cuiure rouge &
letton, blanchis d'estain.



A P A R I S,

Chez SEBASTIEN CRAMOISY Imprim-
meur ordinaire du Roy és Monnoyes, rue
Saint Jacques, aux Cicognes.

M. DC. XXXIII.

AVEC PRIVILEGE DV ROY.





*Extraict des Registres de la Cour
des Monnoyes.*

LA Cour ce requérant
le Procureur General
du Roy en icelle, a
faict & fait expresses
& iteratiues inhibitions & de-
fenses à toutes personnes de quel-
que estat & condition qu'elles
soient, d'apporter ou enuoyer,
exposer ni receuoir aucuns faux
douzains, vulgairement appelez
douzains de la Rochelle, reco-
gnus estre de cuiure rouge &
letton blanchis d'estain : & à
tous Messagers, Voicturiers,
leur Facteurs ou autres, de s'en

A ij

charger , leur enjoignant voir
& visiter tous les douzains
qu'ils apporteront , & reietter
lesdits faux douzains , à peine
aux contreuenans de confisca-
tion tant desdits faux douzains
que des bons , & autres especes
de monnoyes qui y pourroient
estre mellées , de cinq cens li-
ures d'amende, & plus grandes
confiscations & peines portées
par les Ordonnances , le tiers
des amendes & confiscations
applicable aux denonciateurs.
Ordonne ladite Cour fuiuant
le precedent Arrest du 13. Iuil-
let dernier, portant lesdites de-
fenses , qu'à la requeste dudit
P^roc^useur General il sera in-
formé contre les fabricateurs ,

expositeurs & complices del-
dits douzains , & contre ceux
qui en ont exposé, receu & en-
uoyé en cette ville de Paris, &
autres lieux de ce Royaume,
auant & depuis la publication
dudit Arrest, & procedé inces-
samment à l'instruction de leur
procés. Et seront tenus ceux
qui se trouueront saisis desdits
douzains contrains dire & nō-
mer ceux de qui ils les auront
receuz, & à faute de ce faire pu-
nis selon la rigueur desdites Or-
donnances. Et à ce qu'aucun
n'en pretende cause d'ignorance,
le present Arrest sera dere-
chef leu & publié à son de
trompe & cry public, & affi-
ches mises aux carrefours &

lieux accoustumez de cetteditte ville, & copies signées du Greffier de ladite Cour enuoyées en ladite Prouince de Poictou & autres circonuoinnes, aux Generaux subsidiaires, Iuges & Gardes des monnoyes, Iuges Royaux ordinaires des lieux, & Substituts dudit Procureur General, pour estre aussi leu, publié, & tenir la main à l'exécution d'iceluy, à peine d'en respondre en leurs propres & priuez noms, lesquels seront tenus certifier la Cour de leur diligence au mois. Fait en la Cour des Monnoyes le vingt-troisième Aoust mil six cens
~~cent soixante trois.~~

Signé, DELAISTRE.

Le septiesme iour de Septembre mil six
cens trente-trois, l'Arrest de la Cour cy-des-
sus escrit, & les inhibitions & defenses y
mentionnées, ont esté de l'Ordonnance de
ladite Cour, & en la presence de nous
Nicolas Lambert, & Nicolas Laboisiere
Huissiers en icelle, leus & publicz à son de
trompe & cry publicq, par la ville & faux-
bourgs de Paris, lieux & endroicts accoustu-
mez, par Simon Leduc Iuré Crieur de ladite
ville, Preuosté & Vicomté de Paris, accom-
pagné de Mathurin Noiret, iuré Trompette,
& de deux autres Trompettes. Et iceluy Ar-
rest affiché par nous Huissiers susdits, aux
Carrefours & lieux accoustumez, tant de
cette ville que faux-bourgs, à ce que du con-
tenu en iceluy nul n'en pretende cause d'i-
gnorance, sur les peines y mentionnées.

Collationné à l'original par moy Greffier en
chef, en la Cour des Monnoyes soussigné.

